



საქართველო 0198, ქ. თბილისი, კახეთის გზატკეცილი #99, ტელ : 116 001 (180); ელ.ფოსტა: [ncdc@ncdc.ge](mailto:ncdc@ncdc.ge); ვებ-გვერდი: [www.ncdc.ge](http://www.ncdc.ge)  
99 Kakheti Highway, Tbilisi, 0198, Georgia; Phone: 116 001 (180) E-mail: [ncdc@ncdc.ge](mailto:ncdc@ncdc.ge); web: [www.ncdc.ge](http://www.ncdc.ge)

## რეკომენდაციები "ქალაქ ზუგდიდის ცენტრალური ნაწილის განაშენიანების გეგმის პროექტის სტრატეგიული გარემოსდაცვითი შეფასების ანგარიშზე"

**საქმიანობის დამგეგმავი:** საქართველოს რეგიონული განვითარებისა და ინფრასტრუქტურის სამინისტრო

**ანგარიშის წარმდგენი:** შპს „გამა კონსალტინგი“

**შემსრულებელი საკონსულტაციო ორგანიზაცია :** შპს „არტსტუდიო პროექტი“

### პროექტის მოკლე აღწერილობა:

ქ. ზუგდიდის სივრცით-ტერიტორიულ განვითარებაში სახელმწიფო, მუნიციპალური თუ კერძო პირების მიერ დაგეგმილი ღონისძიებების განხორციელებისათვის უპირველეს საჭიროებას წარმოადგენს ქ.ზუგდიდის გენერალური გეგმის (გგ) დამტკიცება, რომლის ამოცანაა დასახლების მთელი ტერიტორიის განვითარება, მისი გამოყენებისა და განაშენიანების ზოგადი რეგულირება და სათანადო უზრუნველყოფა.

ქალაქ ზუგდიდში დღეისათვის არსებული პრობლემებიდან ქალაქმშენებლობის დაგეგმვის კონტექსტში ასევე, აღსანიშნავია ადმინისტრაციულ-საზოგადოებრივი ცენტრის კომპლექსურად მოწესრიგების საჭიროება, ქალაქის ცენტრალური უბნებისა და ქუჩების განაშენიანების იერსახის გაუმჯობესება, პარკირებისა და საზოგადოებრივი სივრცეების მოწყობა, განაშენიანების განვითარებისთვის შეზღუდული ტერიტორიული რესურსების ფონზე მზარდი სამშენებლო საქმიანობები, სატრანსპორტო ქსელისა და ინფრასტრუქტურის მოწესრიგება.

არსებული მიწათსარგებლობის გენერალური გეგმა სრულად ვერ პასუხობს ქალაქში არსებულ გამოწვევებს და შექმნილ პრობლემებს. საჭიროა მისი განახლება და ცენტრალური უბნის (ბულვარისა და ბოტანიკური ბაღის მიმდებარე ტერიტორია) განაშენიანების გეგმის შემუშავება.



ქ. ზუგდიდის ქალაქთმშენებლობითი გეგმის შემუშავების მიზანია:

- ქ. ზუგდიდის მდგრადი განვითარების წინაპირობების შექმნა;
- სატრანზიტო სატრანსპორტო ნაკადებით გამოწვეული უარყოფითი ზემოქმედების შემცირება;
- ადმინისტრაციულ-საზოგადოებრივი ცენტრის ფორმირება;
- ქალაქის ცენტრალურ უბნებისა და ქუჩების განაშენიანების მოწესრიგება;
- ქ. ზუგდიდის საზოგადოებრივი სივრცეების დადგენა და განვითარება;
- ტერიტორიების გამოყენების და განაშენიანების განვითარების პრიორიტეტების დადგენა.

**განხილვა:** სსიპ. ლ. საყვარელიძის სახელობის დაავადებათა კონტროლისა და საზოგადოებრივი ჯანმრთელობის ეროვნულ ცენტრში (შემდგომში „ცენტრი“) მიმდინარე წლის 10 სექტემბერს საქართველოს რეგიონული განვითარების და ინფრასტრუქტურის სამინისტროდან შემოსული წერილის N 01/3188, 10/09/2020 საფუძველზე, რომელიც ეხება ქ. ზუგდიდის გენერალური გეგმის და ცენტრალური უბნის განაშენიანების გეგმის პროექტის სტრატეგიული გარემოსდაცვითი შეფასების მიზნით, შესაბამისი რეკომენდაციების გაცემას, გარემოსდაცვითი შეფასების კოდექსის 27-ე მუხლის მე-7 ნაწილის შესაბამისად, მომზადდა ჯანმრთელობაზე ზემოქმედების შემცირების/შემარბილებელი ღონისძიებებისაკენ მიმართული რეკომენდაციები, რომლებიც დამგეგმავმა ორგანომ უნდა გაითვალისწინოს პროექტის განხორციელების და ექსპლუატაციის ეტაპებზე.

გარემოსდაცვითი შეფასების კოდექსის მე-5 თავის „სტრატეგიული გარემოსდაცვითი შეფასების“ 27 მუხლის „სგშ-ს ანგარიშის განხილვა და რეკომენდაციების გაცემა“ მე-3 და მე-4 ნაწილების შესაბამისად, 2020 წლის 11 დეკემბერს ცენტრმა მოიწვია საექსპერტო კომისია, რომელმაც იმსჯელა წარმოდგენილ დოკუმენტებში მოწოდებული ინფორმაციის შესახებ, რის საფუძველზეც მომზადდა რეკომენდაციები, რათა მაქსიმალურად იქნას გათვალისწინებული ადამიანის ჯანმრთელობასთან დაკავშირებული ასპექტები და მინიმუმამდე იქნას შემცირებული გარემოზე და ადამიანის ჯანმრთელობაზე უარყოფითი ზემოქმედება:

## 1. სასმელი წყლის ხარისხი, წყალმომარაგება, სანიტარია და წყალარინება

წარმოდგენილ დოკუმენტში არ არის განხორციელებული არსებული წყალმომარაგებისა და სანიტარიის, წყალარინების პირობების საკითხის დეტალური შესწავლა, ანალიზი და მისი გაფართოების შესაძლებლობები განაშენიანების ახალ ტერიტორიებზე.



მდინარეების დაცვა დაბინძურებული საკანალიზაციო ჩამდინარე წყლებით. გაუმჯობესების ღონისძიებათა კომპლექსის დაგეგმვა და გეგმის ამოქმედების მონიტორინგის ინდიკატორები არ არის დადგენილი (მოსახლეობის რამდენ % გაუმჯობესდება ხელმისაწვდომობა ხარისხიან სასმელ წყალსა და ადეკვატურ სანიტარიაზე).

## 2. მწვანე დერეფნის შექმნა

აღნიშნულ საკითხთან დაკავშირებით, მისასაღმებელია ქ. ზუგდიდის გენერალური გეგმის კონცეფციაში მწვანე დერეფნის და ბულვარის კონცეფცია, თუმცა, საინტერესოა, ჩატარდა თუ არა წინასწარი კვლევა:

- საცობების წარმოქმნის;
- სატრანსპორტო ნაკადების ოპტიმიზაციის;
- ავარიებისა და განვითარებული ტრავმების ანალიზის შესახებ;
- და ზემოაღნიშნულის კვლევების ანალიზის გარეშე, რამდენად მიზანშეწონილია ქუჩების დავიწროვების საკითხი?

ამასთანავე, წარმოდგენილ მასალაში არ არის მოწოდებული ინფორმაცია

- რამდენად განხორციელდება შეზღუდული შესაძლებლობების მქონე პირების (შშმ პირების) მოთხოვნების გათვალისწინება აღნიშნული იფრასტრუქტურული პროექტების დაგეგმვის და განხორციელების ეტაპებზე.

## 3. ხელმისაწვდომობა საგანმანათლებლო და სააღმზრდელო დაწესებულებებზე

განახლებულ ვერსიაში წარმოდგენილი ინფორმაციის თანახმად, ზუგდიდის ხუთ სხვადასხვა ადმინისტრაციულ უბანში (ი.ქ.კ, კოლხეთის, ეგრისის, ოდიშის, მაცხოვრისკარი) არსებობს კონკრეტული სოციალური ინფრასტრუქტურის საჭიროება; ზოგიერთ მათგანში, საჯარო ბაღების/სკოლების და მათთან მისაწვდომობის სიმცირის გამო, პროექტით შემოთავაზებულია, როგორც საბავშვო ბაღების (ი.ქ.კ და მაცხოვრისკარის უბნები), ისე საჯარო სკოლის (კოლხეთის და ოდიშის უბნები) განთავსება.

აღსანიშნავია, რომ ქ. ზუგდიდის ადმინისტრაციული უბნებისა და დამატებითი ცენტრების განვითარების შემოთავაზებული ხედვა გულისხმობს პატარა მასშტაბის ქვეცენტრების გამოყოფას, სადაც განთავსდება პირველადი მომსახურების ინფრასტრუქტურა. მსგავსი პოლიცენტრული განვითარება თანაბარ პირობებში ჩააყენებს ქალაქის სხვადასხვა ნაწილში (ადმინისტრაციულ უბანში) მცხოვრებ მოსახლეობას.



მიუხედავად იმისა, რომ განახლებულ ვერსიაში წარმოდგენილია წინა ვერსიასთან შედარებით ბევრად დეტალური ინფორმაცია, იმის შესახებ თუ:

- რა სახის ღონისძიებების გატარებაა დაგეგმილი საგანმანათლებლო დაწესებულებებზე ხელმისაწვდომობის თვალსაზრისით (ადმინისტრაციულ უბნებში საჯარო სკოლების/საბავშვო ბაღების მშენებლობა);
- წარმოდგენილი არ არის ინფორმაცია შშმ პირთა მოთხოვნების გათვალისწინების საკითხთან დაკავშირებით.

მნიშვნელოვანია, განისაზღვროს თუ რამდენად არის გათვალისწინებული კონცეფციაში აღნიშნული საკითხები.

#### 4. დასაქმება

განახლებულ ვერსიაში წარმოდგენილი ინფორმაცია დასაქმების საკითხთან დაკავშირებით არის ბევრად დეტალური და მის თანახმად, ქ. ზუგდიდის ეკონომიკური განვითარება ეფუძნება წარმოების, ტურიზმის, ვაჭრობის, მშენებლობის და სხვა დარგების განვითარებას. ამასთანავე, ზოგად სტრუქტურაში დაგეგმილია, საჯარო სექტორში დასაქმების როლის შემცირება, კერძო სექტორის განვითარების ხარჯზე.

როგორც წარმოდგენილ დოკუმენტაციაშია ხაზგასმული, ანაკლიის ღრმაწყლოვანი პორტი, თავისი მაშტაბებიდან გამომდინარე გაზრდის მოთხოვნას მუშახელზე. ასევე, ტურიზმის განვითარება, თავისთავად ხელს შეუწყობს ადგილობრივთა დასაქმებას. ასევე, იქიდან გამომდინარე, რომ ქ. ზუგდიდის სიახლოვეს იწარმოება მრავალი პროდუქტის (თხილის, სიმინდის, მსხლის, ლიმნის, ხორცის, რძის, თაფლის) მნიშვნელოვანი რაოდენობა, შესაბამისად, არსებობს ამ პროდუქტების წარმოების შესაძლებლობა, რაც თავისთავად, გავლენას იქონიებს დასაქმების კოეფიციენტზე.

ასევე, დადებითად შესაფასებელია ის ფაქტი, რომ ქ. ზუგდიდის ქალაქმშენებლობითი გეგმის შემუშავების დავალების ფარგლებში განხორციელდა სოციოლოგიური კვლევა, რომლის ერთ-ერთ მნიშვნელოვან შედეგს სწორედ მაღალი უმუშევრობის საკითხი წარმოადგენს („ქ. ზუგდიდის ეკონომიკრად აქტიური მოსახლეობის 30.8% უმუშევარია“) და არსებობს რეალური გეგმა, თუ როგორ შეიძლება მოგვარდეს აღნიშნული პრობლემა გრძელვადიან პერსპექტივაში.

ზუგდიდის უახლოესი სოფლები წარმოადგენს სოფლის მეურნეობის პროდუქტების წარმოების მნიშვნელოვან სეგმენტს, ხოლო მრეწველობის განვითარებისათვის არ არის გათვალისწინებული შესაბამისი დასაქმებისა და საინვესტიციო პროგრამების განხორციელების შესაძლებლობა სასოფლო-სამეურნეო პროდუქტების



გადამამუშავებელი/შემნახველი ინფრასტრუქტურის განვითარებით, რაც უზრუნველყოფს ადგილობრივი მოსახლეობის დასაქმებას და საქსპორტო პოტენციალის ზრდას.

ასევე, პრობლემად რჩება კურორტ ცაიშის ჩართვა ზუგდიდის ეკონომიკური განვითარების ხედვაში და სამკურნალო ტურიზმის განვითარების საკითხი, რომელიც წარმოდგენილ პროექტში არ არის გათვალისწინებული, რაც ხელს შეუწყობს ზუგდიდის და ირგვლივ არსებული სოფლების მცხოვრებთა დასაქმების გაუმჯობესებას, ტურისტული ინფრასტრუქტურის განვითარებას, სოფლის მეურნეობის პროდუქტების წარმოებასა და ეკონომიკურ გაძლიერებას. მნიშვნელოვანია ცაიში განიხილოთ ზუგდიდის აგლომერაციის ჭრილში, რაც განსაკუთრებულ მნიშვნელობას შეიძენს ქალაქის განვითარების სამომავლო სტრატეგიული სტატუსის დადგენისათვის, რომელიც ადგილობრივი, ეროვნულ და გლობალურ დონეზე განსაზღვრავს ზუგდიდი-ცაიშის აგლომერაციის სტრატეგიული განვითარების მთავარ მიზნებსა და მისიას:

- მოსახლეობის ყველა ფენის ცხოვრების დონის სტაბილური გაუმჯობესება;
- მრავალფუნქციური ქალაქისა და ქვეყნის/გლობალურ დონეზე სამედიცინო/ბალნეოლოგიური სამკურნალო ტურიზმის განვითარება;
- ზუგდიდი-ცაიშის თერმული წყლის საბადოს დიდი როლი რეგიონის მდგრადი განვითარებასა და ეკონომიკაში ინტეგრირება;
- გონივრული, რაციონალური და მდგრადი გამოყენება ზუგდიდი-ცაიშის თერმული წყლის საბადოს ჭაბურღილების პოტენციალის.

## 5. ატმოსფერული ჰაერის დაბინძურება და ხმაური

კომენტარი: ქალაქ ზუგდიდის გენერალური გეგმისა და ცენტრალური ნაწილის განაშენიანების გეგმის სტრატეგიული გარემოსდაცვითი შეფასების საბოლოო ანგარიშთან დაკავშირებით, დაავადებათა კონტროლისა და საზოგადოებრივი ჯანმრთელობის ეროვნული ცენტრის მიერ გაცემული შენიშვნები გათვალისწინებულია. მომზადებულ დოკუმენტში, აღწერილია:

- ატმოსფერული ჰაერის ხარისხის საბაზისო მონაცემები და წარმოდგენილია 2015-2018 წწ-ში გარემოს ეროვნული სააგენტოს მიერ აღებული სინჯების ადგილმდებარეობა და დამაბინძურებელ ნივთიერებათა შემცველობა.
- წარმოდგენილია 2012-2013 წწ-ში ზუგდიდში მონხმარებული ენერგორესურსების (ელექტრო ენერგია, ბუნებრივი აირი, მშენიანება და ა.შ) შესახებ ინფორმაცია და განხილულია ქალაქ ზუგდიდის ენერგეტიკის



მდგრადი განვითარების გრძელვადიანი სტრატეგიით გათვალისწინებული ამოცანები (ქალაქის თბომომარაგებაში განახლებადი ენერჯის წილის გაზრდა; შენობების სახურავების თბოიზოლაციას საბავშვო ბაღებში და ა.შ.);

- წარმოდგენილია ინფორმაცია ქალაქში არსებული შიდა წვის ძრავიანი ავტოტრანსპორტი შესახებ (როგორც მუნიციპალური ტრანსპორტი, ისე კერძო პირებზე რეგისტრირებული ავტომანქანები);
- პროექტის დაგეგმვის პროცესში განსახორციელებელი ღონისძიებებში გაწერილია ატმოსფერული ჰაერის ხარისხის მონიტორინგის სადგურის განთავსება;
- ჰაერის ხარისხის მოსალოდნელი გაუარესების თავიდან აცილების მიზნით, გაწერილია შემარბილებელი ღონისძიებები და თითოეული ალტერნატივის განხორციელების შემთხვევაში, დეტალურად არის განხილული მოსალოდნელი ზემოქმედება გარემოსა და/ან ადამიანის ჯანმრთელობაზე. ცენტრი მიესალმება პროექტით დაგეგმილი აქტივობების განხორციელებას, რომელიც შეეხება სატრანსპორტო სქემების ოპტიმიზაციას, საგზაო ქსელის გაუმჯობესებას, ეკო-მეგობრული ტრანსპორტის ხელშეწყობას და დაგეგმილი შემოვლითი საავტომობილო გზების არსებობას, რაც გამოიწვევს ატმოსფერული ჰაერის და ხმაურის დაბინძურების გავლენის შემცირებას. თუმცა უნდა აღინიშნოს, რომ პროექტის განხორციელების და შემდგომ ეტაპებზე, ახალი და შემოვლითი გზების გასწვრივ მოსალოდნელია ატმოსფერული ჰაერის და ხმაურის დაბინძურების გაზრდა. სგშ დოკუმენტში წარმოდგენილი ალტერნატივების შეფასების მეთოდოლოგიის საფუძველზე, გარემოზე ნაკლები ზემოქმედების გათვალისწინებით უპირატესობა მინიჭებული აქვს ცენტრის განმტკიცრთავ გზა N1-ს (დასავლეთის მხარეს), რომელიც გარემოზე შედარებით ნაკლები ზემოქმედებით ხასიათდება, რადგან შემოვლითი გზა გაივლის ნაკლებად დასახლებულ ტერიტორიებს და ის არ კვეთს ზედაპირული წყლის ობიექტებს, ხოლო გასავლელი ტრასა და რელიეფი სწორია, რაც ნაკლებ მიწის სამუშაოებს საჭიროებს. დოკუმენტში არ არის განხილული და არც არანაირი მოსალოდნელი გათვლებია გაკეთებული თითოეული ალტერნატივის განხორციელების ეტაპზე, როგორი იქნება ზემოქმედება გზების ირგვლივ დასახლებული ადამიანების ჯანმრთელობაზე, შესაბამისად, რეკომენდებულია ოპტიმალური ვარიანტის შერჩევა დეტალური კვლევების და შეფასების საფუძვლებზე მოხდეს.



დოკუმენტში წარმოდგენილია ინფორმაცია ქ. ზუგდიდის ტერიტორიაზე ჩატარებული საველე კვლევების შესახებ, რომლის თანახმადაც დადგინა, რომ ქ. ზუგდიდის ტერიტორიაზე 4 წერტილში ხმაურის ძირითად წყაროს წარმოადგენდა გზებზე მოძრავი ავტოტრანსპორტი. პროექტით გათვალისწინებული ქალაქის შემოვლითი საავტომობილო გზის არსებობის შემთხვევაში, შემცირდება ცენტრალურ ქუჩებზე მოძრავი ავტობილების რაოდენობა და დადებითად აისახება ხმაურის დონის შემცირებაზე.

## 6. ნარჩენების მართვა

წარმოდგენილ სგშ-ს დოკუმენტში საკმაოდ დეტალურად არის განხილული ქ. ზუგდიდში წარმოქმნილი სხვადასხვა ტიპის ნარჩენების, ამ ნარჩენების მართვის ან უკანონო ყრის შესახებ. ასევე, მოწოდებულია ინფორმაცია ადგილობრივი მოსახლეობის მიერ წარმოქმნილი ნარჩენების საპროგნოზო მაჩვენებლების შესახებ წლების მიხედვით ქ. ქუთაისის მსგავსი მონაცემების მოდელირების საფუძველზე. აღნიშნული გათვლებით, მოსახლეობის კლების ტენდენციის ფონზე ნარჩენების გენერირებასაც კლების ტენდენცია უნდა ჰქონდეს, თუმცა გასათვალისწინებელია სეზონურობა, ტურისტული ნაკადები და სამომავლო განაშენიანების დადებითი ტენდენცია, რაც აშკარად იმოქმედებს ნარჩენების ოდენობის ზრდაზე.

ახალი ევროპული სტანდარტების შესაბამისი მყარი საყოფაცხოვრებო ნარჩენების ნაგავსაყრელის მოწყობა ნამდვილად გააუმჯობესებს მთლიანად სამეგრელო-ზემო სვანეთის რეგიონში ნარჩენების სათანადოდ მართვის პირობებს, და ინერტული ნარჩენებისთვის დაგეგმილი ცალკე გამოყოფილი ტერიტორია, ან მათი ამოვსებისათვის გამოყენება მნიშვნელოვანი წინგადადგმული ნაბიჯი იქნება.

წარმოდგენილი დოკუმენტის თანახმად, გენერალური გეგმა არ ითვალისწინებს ნარჩენების მართვის სქემის შექმნას და შესაბამისი ღონისძიებების გატარებას, თუმცა მდ. ჩხოუშიას კალაპოტის გაწმენდა, რომელზეც დოკუმენტი აქცენტირებულია, მნიშვნელოვნად შეუწყობს ხელს „თვითნებური დაყრის“ პრაქტიკის მოშლას. ამასთან, საჭირო იქნება მოსახლეობაში ცნობიერების კამპანიების გატარება ნარჩენებთან დაკავშირებული რისკების და ადამიანისა და გარემოს ჯანმრთელობისთვის დამაზიანებელი ეფექტების შესახებ, ისევე როგორც, მუნიციპალიტეტის მიერ შესაძლო სანქციების დაწესებაზე, კანონით განსაზღვრული რეგულაციების დარღვევის (უკანონო ყრის) შემთხვევაში. რეკომენდებულია, ასეთ საგანმანათლებლო კამპანიებში მუნიციპალური, არასამთავრობო და კერძო სექტორის ერთობლივი მოქმედება და ჩართულობა.



გასათვალისწინებელია, ძველი საწარმოო ტერიტორიების (მ.შ. ქაღალდის ცელულოზის საწარმო) აზბესტემცველი ნარჩენებისაგან სათანადო რეგულაციების შესაბამისად გაწმენდა, ამ ტიპის ნარჩენებისგან მომდინარე საფრთხეების გათვალისწინებით. ვინაიდან, კონცეფციის მიხედვით, აღნიშნულ ტერიტორიებზე იგეგმება ინდუსტრიული პარკების მოწყობა, გასათვალისწინებელია ინდუსტრიულ საქმიანობასთან დაკავშირებული ნარჩენების კონკრეტული მართვის გეგმების შემუშავება და რაციონალურად შესრულება. რეკომენდებულია, ძველი საწარმოს ტერიტორიების შესახებ დეტალური გეგმების შემუშავება არა მარტო არსებული აზბესტემცველი ნარჩენების მართვის პროცედურების გათვალისწინებით, არამედ საწარმოო პროცესებთან მიმართებაში (როგორცაა, მყარი და თხევადი (მ.შ. სახიფათო) საწარმოო ნარჩენები და მათი მართვის მექანიზმები/სქემები).

წარმდგენილ სგშ-ს ანგარიშის დოკუმენტში არ არის გამახვილებული ყურადღება სამედიცინო დაწესებულებებში წარმოქმნილი ნარჩენების მართვასთან დაკავშირებით. განაშენიანების ეტაპზე, განსაკუთრებით ტურისტული და ინდუსტრიული განვითარების ფონზე, მოსალოდნელია სამედიცინო მომსახურებაზე (მ.შ. სტომატოლოგიური) მოთხოვნის ზრდა, რაც გამოიწვევს ასეთ მომსახურებასთან დაკავშირებული ნარჩენების (კერძოდ, სამედიცინო ნარჩენების) ზრდის ტენდენციას და შესაბამისად, საჭირო გახდება ამ ტიპის ნარჩენების მართვისა და მონიტორინგის გაძლიერება, რაც უნდა აისახოს ნარჩენების მართვის გეგმებში.

## **7. ხელმისაწვდომობა სამედიცინო დაწესებულებებზე**

ქ. ზუგდიდის სოციალური ინფრასტრუქტურის განვითარების ნაწილში ხაზგასმულია ქ. ზუგდიდის ზოგიერთ ადმინისტრაციულ უბანში სამედიცინო დაწესებულებების (ამბულატორიული კლინიკების) განთავსების საჭიროება, კონკრეტული უბნების (კოლხეთის და ეგრისის უბნები) მაცხოვრებელთათვის უახსლოესი საავადმყოფოს შედარებით მოშორებით მდებარეობის გამო. ამასთანავე, დადებითად შესაფასებელია, რომ ქ. ზუგდიდის გენერალური გეგმით განსაზღვრულია ტერიტორიები, რომლებზეც განსაზღვრულია სპეციალური ფუნქცია, კერძოდ აღნიშნულ „სპეციალურ ზონაში“ განვითარებულია ჯანდაცვის კომპლექსები. აღნიშნული ზონა ვრცელდება ქ. ზუგდიდის 2 ადმინისტრაციული უბნის ტერიტორიებზე.

წარმოდგენილ დოკუმენტაციაში არ არის მოწოდებული იფნორმაცია, თუ როგორია ქ. ზუგდიდში სასწრაფო სამედიცინო დახმარების სერვისის მოცვა და არის თუ არა კონცეფციაში გათვალისწინებული ზუგდიდის სხვადასხვა უბანში სასწრაფო სამედიცინო დახმარების სადგურების განთავსება.





**რეკომენდაციები:**

ცენტრი, საექსპერტო კომისიის გადაწყვეტილების საფუძველზე, დადებითად აფასებს წარმოდგენილ პროექტს „ქ.ზუგდიდის გენერალური გეგმისა და ცენტრალური უბნის განაშენიანების გეგმის პროექტის სტრატეგიული გარემოსდაცვითი შეფასების ანგარიშს“. წარმოდგენილ დოკუმენტში მოწოდებულია შესაბამისი რეკომენდაციები, რომელიც დამატებით უნდა გაანალიზდეს პროექტის განხორციელების ყველაზე ადრეულ ეტაპზე, რათა მაქსიმალურად დაიგეგმოს და გატარდეს ადამიანის ჯანმრთელობაზე მოქმედი რისკ-ფაქტორების თავიდან აცილებისა და/ან შემარბილებელი ღონისძიებები ზემოქმედების არეალებისა და მასშტაბების გათვალისწინებით.

პატივისცემით,

გენერალური დირექტორი



ამირან გამყრელიძე